

## JEO, OMMINE

In sa ruta  
solu chin s'iscuru e-i su lampu  
apo mortu su vrade  
po lacanar de campos.

E costruiu una dommo, pred'a preda,  
manna: chin feridorzas  
po prantare vrizzas in su coro.

Apo valsau sa limba 'e sor frores  
e risiu 'e su biancore 'e sa luna.  
E barvatau sa terra  
chin arador de ocu  
e intintu 'e triscu  
sas abba' limpiar de su riu,  
chi la trazzet a mare  
sa partichedda sua 'e su 'enenu.

E mi anto 'e s'imbentu  
d'una barca solare  
chi pranat in sos astros un'iscudu:  
po bersagliu!

E a Deu m'invoco, chi m'azuet  
in gherra, po s'egoismu 'e su coro.

Ma cale bruttu sognu s'esistenzia!  
Oje, cherzo nascher Ommine!  
M'imbrenuco a su sole, e m'arrepento,  
prima chi 'ole alluttu che coette  
in artu, disperdendemm'in su nudda.

Cherzo liber'unu campu!  
E costruo una dommo chene muros  
po chi da 'ogni banda  
intenda sos umores de su mundu.

Cherzo una mesa manna, a tiaza irde,  
po collire  
sor frader de sa Terra;  
e unu libru mannu  
po aer conoschessia  
de sar dottrinas: a lucru 'e s'amore.

E una pinna, po lassare iscrittu,  
a sor de cras, s'imbentu 'e su coro.

E pustis, in su zardinu umanu  
ponner a frigidura de unu sinu:  
su vrove eternu d'una vida noa.

## IO, UOMO

*Nella grotta / immerso nel buio e nel lampo. / Ho ucciso mio fratello / per confini di campo.*

*Pietra su pietra elevai una casa, / grande: con feritoie / per conficcare frecce nei cuori.*

*Ho falsato la lingua dei fiori / e deriso il candore della luna. / Ho solcato la terra / con aratri di fuoco, / e tinto di cicuta / le acque del fiume / perché conducano al mare / la loro parte di veleno.*

*Mi vanto d'aver inventato / una barca solare / che poggia negli astri uno scudo: / per bersaglio!*

*Invoco Dio, che m'aiuti / nella guerra del mio egoismo.*

*Ma quale brutto sogno l'esistenza! / Oggi, voglio rinascere, Uomo! / Pentito mi inginocchio al sole / prima che, come stella filante / voli in alto, verso il nulla.*

*Voglio un campo di libertà. / Costruirò una casa senza muri / perché i venti / mi portino gli umori del mondo.*

*Ed un'immensa mensa, con verde di tovaglia / per accogliere i fratelli della terra. / E un libro / per avere conoscenza / delle dottrine: a lucro d'amore.*

*Ed una penna, per lasciarvi scritte / le invenzioni del cuore.*

*Poi nel Giardino Umano / offrire, alla fioritura di un seno: / il fiore eterno della Vita Nuova.*